



## Terenga 4: Hōtaka 22 - Mā...e / Whakakāhoretanga

### He Mihi

Kei ngā ihoiho o ngā maunga whakahī o te motu, tēnā anō rā koutou katoa. E rere tonu nei ngā mihi ki a koutou i te rite tonu o tā koutou ū mai ki tēnei kaupapa whakatairanga i te reo. Ehara i te mea he mahi tautauāmoa tēnei. Mā rau takitini rawa e ora ai tēnei reo rerehua o tātou.

### Hei Mahi Whakarongo

Kia tahuri tātou ki te whakarongo ki ngā kōrero a Te Ahukaramu Royal e pā ana ki ngā āhuatanga o te tangata. Anei ngā pātai hei whakautu mā koutou:

- 1) Nā wai te kōrero?
- 2) He aha te kōrero?
- 3) Mā wai ō tātou hara e muru?

### He Whakamārama

Tīmata ai ngā rerenga e aro ana ki te kaimahi, ki ngā kupu 'Mā' me 'Nā'.

Mā...e (wā heke)     **Mā** tātou e whakatairanga te reo.

Nā...i (wā hipa)     **Nā** Miriama ngā kākahu i tuitui.

Kua tirohia kētia te huarahi hei whakakāhore i te rerenga e tīmata ana ki te 'Nā' e aro atu ana ki te kaimahi.

**Nāku** te pikitia i tā.

1. **Ehara i a au i tā** te pikitia.

Anei te huarahi hei whakakāhore i ngā rerenga ka tīmata ki te kupu 'Mā'.

**Māku** e hanga te whare.

1. **Ehara** (i te mea) **māku** e hanga te whare.
2. **Kāore** (e tika ana) **māku** e hanga te whare.
3. **Kaua** (e riro, e waiho) **māku** e hanga te whare. Mā Tio kē.

### Hei Mahi

**Whakakāhoretia ēnei rerenga:**

1. Mā ngā tamariki te reo e whakaako.
2. Mā te rangatahi ngā tikanga marae e whakatau.
3. Mā ngā kaiāwhina ngā manuhiri e whakatau, i ngā wāhi mahi.
4. Mā te kapa taua kaupapa e whiriwhiri.

### Whakautu:

1. Ehara mā ngā tamariki te reo e whakaako.
2. Kaua mā te rangatahi ngā tikanga marae e whakatau.
3. Kāore mā ngā kaiāwhina ngā manuhiri e whakatau.
4. Ehara mā te kapa taua kaupapa e whiriwhiri.